

盡歸仁壽之域。臣奉明詔，併工繕錄。俾封疆之內，日月俱懸。雖聾瞽而必知，在幽偏而亦達。臣所守有限，不獲走奔闕下，蹈舞彤庭。無任踴躍屏營之至。

〔注〕「貞」字原脫。新唐書藝文志三：「德宗貞元集要廣利方五卷。」據補。

以上文苑英華卷五百九十四

陋室銘〔注〕

山不在高，有僊則名。水不在深，有龍則靈。斯是陋室，惟吾德馨。苔痕上階綠，草色入簾青。談笑有鴻儒，往來無白丁。可以調素琴，閱金經。無絲竹之亂耳，無案牘之勞形。南陽諸葛廬，西蜀子雲亭。孔子云：何陋之有。

〔注〕此篇恐非劉文。

以上全唐文卷六百八十

擬門下侍郎平章事制〔注〕

門下：天地至大，任四時以成功；元首雖尊，託三台而佐理。況外居黃閣，入奏青蒲。寅亮皇猷，緝熙帝載。以相予位，以安兆人。必有夢卜之期，式重將明之職。求其具位，果獲